

Script of Evening Gojri News Bulletin 30 August 2026 at 1700 Hrs

ایوننگ گوجری نیو ز بلیٹن مو رخہ 30 اگست 2026

Headlines

یوہ آکا شوانی جموں ہے عبید الرحمان تیں خبر سُنو پہلاں خاص خبر۔

*1- وزیر اعظم نریندر مو دی نے من کی بات پروگرام مانہ پی ایم سواندھی غے تحت خواتین غی باختیا ری ور روشنی پاتاں واں کہیو ہے کہ اس اسکیم غے تحت 35 لکھ خواتین فائدو حاصل کر رہی ہیں۔

*2- وزیر اعظم نریندر مو دی نے نوجواناں ، مو سيقاراں تے دیگر مواد بنان آلاں نانہ کہیو ہے کہ وے نشہ مُکت بھارت ابھیان واسطے مواد اور نعرہ لکھیں۔

*3- لیفٹنٹ گورنر منوج سنہا نے اج شری ماتا ویشنو دیوی شرائین بورڈ غی منعقد سالانہ بنیا دی تیہاڑا تقریب مانہ خطاب کیو ہے ۔

*4- ضلع کٹھوعہ غے اندر کساناں نے بنی غا دور دراز پہاڑی علاقہ مانہ اخروٹ غی فصل اکھٹی کرنی شروع کر لی ہے ۔

*5- تے قومی شاہراہ این ایچ 44 ور ضلع رام بن مانہ جا ری 4 لین غو کم تیزی نال جاری ہے اور نواں ٹنل اور جدید سڑک تعمیر اتی ڈھانچاں نال مسافراں نانہ کافی راحت مل رہی ہے ۔

خبراں غی تفصیل نال پہلاں محمد امین انجم۔

PM-MKB

وزیر اعظم نریندر مو دی نے کہیو ہے جے وکست بھارت مہم واسطے نشہ مُکت یوا مُلک پہر مانہ تیزی نال رفتار حاصل کر رہیا ہیں ۔ اج سویرے آکاشوانی ور من کی بات پروگرام غے دوران جناب مو دی نے خوشی غو اظہار کیو جے مہم مانہ خاص طور ور نوجوان بڑی گنتری مانہ شامل ہو رہیا ہیں ۔ انہاں نے اس راہ کہیو۔ بائٹ۔ وزیر اعظم نے کہیو جے نشہ غی عادت صرف واحد فرد نانہ نہیں گھیرتی بلکہ اس غی وجہ نال پورو خاندان تے سماج نتیجہ بُھگتے۔ وزیر اعظم نے نشہ تیں بچاؤ بارے بیداری عام کرن آلاں غی تعریف کی۔ انہاں نے کہیو۔ بائٹ۔ جناب مودی نے کہیو جے لکھاں کالسریں پی ایم سواندھی یوجنا غے ذریعے مضبوطی حاصل کر رہی ہیں ۔ انہاں نے کہیو جے خواتین باختیا ری غا اس پہلو ور اتنو تبا دلہ خیال نہیں ہوئو جتنو ہونو لوڑے تھو۔ وزیر اعظم نے کہیو جے پی ایم سواندھی یوجنا تیں فائدو حاصل کرن آلاں مانہ کالسریاں غی گنتری تقریباً 46 فیصد ہے ۔ انہاں غو کہنو تھو ۔ بائٹ۔ وزیر اعظم نے کہیو جے صفائی غیر معمولی معیار رکھے۔ انہاں نے کہیو جے جد اک جگہ صاف کرن غو فیصلو

لوکاں غو اپنو عزم بن جائے تاں یوہ جگہ غی شناخت مکمل طور ور تبدیل کر دے۔ جناب مودی نے کہیو جے مُلک غی لڑکیاں غا خواباں غی پرواز اج دھرتی تیں خلاء در بدھ رہی ہے۔ اُنہاں نے کہیو جے دُنیا پھر تیں بھارت اُن ہزاراں لڑکیاں نانہہ اکھٹاں کر رہیوے جہیزیں ایسا خواب پال رہی ہیں۔ وزیر اعظم نے کہیو جے اِس سلسلہ غی شروعات غوناں مشن شکتی ست ہے۔

LG SMVDSB

لیفٹنٹ گورنر منوج سنہا نے شری ماتا ویشنو دیوی شرائین بورڈ غا یوم تاسیس اور شری ماتا ویشنو دیوی گروکول غا سالانہ تیہاڑا غا سلسلہ مانہہ خطاب کیو۔ اِس موقع ور بولتاں واں اُنہاں نے تعلیم مانہہ قدراں تے سائینس غا توازن ور زور پایو۔ اُنہاں نے کہیو جے تجسس علم غا دیا غو پہلو قدم ہے۔ لیفٹنٹ گورنر نے پائیدار ترقی تے موسمیاتی نتیجاں ور وی زور پایو۔ بائٹ۔

مزید خبراں نال عبید الرحمان ور اُس تیں پہلاں یوہ سنیو۔

Walnut Harvesting

ضلع کٹھوعہ مانہہ بنی غا پہاڑی علاقہ مانہہ کساناں نے آخروٹ توڑن گو کم شروع کر دتو ہے۔ اِس نانہہ اپنی محنت غو پھل قرار دیتاں واں کساناں نے کہیو ہے جے ویں موسم آن غو بے صبری نال انتظار کر رہیا ہیں۔ اِس سلسلہ مانہہ کسان تے اُن غا کُنہہ سرگرمی نال پکا آخروٹ اکھٹا کر رہیا ہیں۔ اِن خطاں غا لوک قدرتی طریقہ غے ذریعے کاشت کریں تے بازار مانہہ بیچن تیں پہلاں صاف کریں اور 5 تیں 6 تیہاڑاں تک دھوپ مانہہ سُکھاویں۔ مقامی کسان آخروٹ غی کاشت نانہہ ناصرف اک زمینداری سرگرمی قرار دیں بلکہ یوہ آمدن غو اک بڑو ذریعو وی ہے۔ اِس بارے اک کسان نے اِس راہ کہیو۔ بائٹ۔

NH-44

ضلع رام بن مانہہ قومی شاہراہ این ایچ 44 غو چل رہیو 4 پالی کم نمایاں طور ور رام بن بانہال خطرناک حصہ نانہہ سُرنگاں، پُلاں تے جدید سڑک بنیا دی ڈھانچہ غے ذریعے بہتر بنا رہیو ہے۔ اِس سلسلہ مانہہ بہتر بنایا گیا حصاں نے ٹریفک غی آٹو جائی تے مسافراں اور ڈرائیوراں واسطے حفاظت تے آرام چنگو بنایو ہے۔ اِسے دوران 32 کلو میٹراں تیں تقریباً 9 کلو میٹر غو حصو مکمل ہونو باقی رہ گئیو ہے، تے پروجیکٹ مکمل کرن غو ہدف دسمبر 2027 غو مقرر کیو گئیو ہے ہور جانکاری این ایچ اے آئی غا پروجیکٹ ڈائریکٹر شوبہم یادو تیں بائٹ۔

Laghu Udhyan

لگو اُدھیمی اقدام غے تحت ابتدائی سطح غی خوبصورتی تربیت خاطر اک ہنر ترقیاتی تربیتی پروگرام مانہہ گُل 27 اُمید واراں نے حصو لیو اور تربیت حاصل کی ہے۔ اِس پروگرام غو مقصد خود روزگار نانہہ باہدو دینو تھو۔ اِسے دوران 30 دیہی خواتین غو اک الگ بیچ کٹینگ اور کپڑاں غی سلائی غی تربیت حاصل کر رہیو ہے۔ آکاشوانی نیوز نال گل کرتاں واں ایس بی آئی – غا دیہی خود روزگار تربیتی ادارہ غا ڈائریکٹر منیش شرما نے اِس طرح کہیو۔ بائٹ۔ اِس دوران بولتاں واں تربیت حاصل کرن آلاں نے اپنا تاثرات اِس طرح پیش کیا۔ بائٹ۔

UG Admission Phase 2

اعلیٰ تعلیم محکمہ جموں کشمیر نے جموں کشمیر غا سرکاری ڈگری کالجاں مانہہ انڈر گریجوٹ داخلہ غا سلسلہ غو دوجو مرحلو شروع ہون غو اعلان کیو ہے ۔ اس سلسلہ مانہہ اُن طالب علماں واسطے داخلہ کا روائی کھلی ہے جہڑا 12 ویں غا بائی اینول سپلمنٹری یاہ پرائیوٹ امتحانات 2026 مانہہ اہل قرار دتا گیا ہیں۔ یہ داخلہ مرکزی پورٹل برائے داخلہ JKadmissions.in غے ذریعے منعقد ویں گا ۔

اس غے نال ہی خبراں غو یوہ بلیٹن ختم ہوئو۔